

یوہ آکاشوانی جموں بے محمد مبارک ماہرتیں خبر سُنو۔

PM FRENCH

وزیر اعظم نریندر مودی فرانس غا سدر ایمانوئل میکرون غے نال آج صویرے جنوبی فرانس غا مار سیلے پُجا آکاشوانی غا نامہ نگار غے مطابق مارسیلی مانہ بہارتی برادری نے وزیر اعظم غا ان غی آمد ور بڑا جوش تے جزیہ سنگ استقبال کیو وزیر اعظم نریندر مودی تے صدر میکرون نے سانجہ طور ور مارسیل مانہ بہارت غا پہلا نواں قونصل خانہ غو افتتاح کریں گاتے نال ہی دوجی اہم تقریبیں مانہ بہارت شرکت کریں غلوزیر اعظم نے ایک سوشل میڈیا پوسٹ میں کہیو کہ یوہ دورو بہارت تے فرانس نانہ مزید نیڑے کرن بارے اہم پروگرامان نانہ اجاگر کیو۔اُن نے کہیو جے بہارتی قونصل خانو لوکان غا رابطان نانہ مزید مضبوط بناوے غو۔وزیر اعظم نے کہیو جے وے آج پہلی تے دوجی عالمگیر جنگ مانہ شہید ہون آلا بہارتی فوجیاں نانہہ خراج عقیدت پیش کریں غا۔

SHAH J&K

وزیر داخلہ امت شاہ نینوی دلہ مانہہ جموں کشمیر مانہہ حفاظتی صورتحال غو جائیزو لین غا سلسلہ مانہہ اعلیٰ سطحی بیٹھکال غی صدارت کی ان بیٹھکال مژکورہ وزیر نے تمام حفاظتی ایجنسیاں تے نیم فوجی دستاں غا اعلیٰ عہدیداران نانہہ جموں کشمیر نانہہ دہشت گردی تیں پاک رکھن بارے زور دیتا واں کہیو جے وے سرحدان غی حفاظت نانہہ بہتر بنان تے نگرانی کرن خاطر نوی ٹیکنالوجی غو استعمال کریں اُن نے کہیو جے نوی ٹیکنالوجی مہار حفاظتی نظام نانہہ بہتر بنان مانہہ مچ کارآمد ہے مرکزی وزیر نے کہیو کہ وزیر اعظم نریندر مودی غی قیادت مانہہ مرکزی سرکار دہشت گردی تیں پاک جموں کشمیر بارے پُر عزم ہے۔اس موقع ور وزیر داخلہ نے سی۔آر۔پی۔ایف نانہہ بہارتی فوج تے جموں کشمیر پُل نال رل غے حفاظتی صورتحال مانہہ بہتر کارکردگی تے تعاون جاری رکھن بارے وی ہدایت کی۔

JAWAN IED

ضلع جموں گا اکھنور سیکٹر غا لالیلی علاقہ غے نیڑے کل ایک مشتبہ آئی۔ای۔ڈی دھماکہ مانہہ دو فوجی جوانان سمیت ایک آرمی کیپٹن شہید ہو گیو۔چار تہاڑاں مانہہ جموں خطہ مانہہ دہشت گردان غی طرفوں سرحد پار کاروائی غو یوہ تیجو واقعہ تھو فوج نے شہیدان غی شناخت کیپٹن کرن جیت سنگھ پخشی تے نائیک میکشن سنگھ منہاس غا طور ور کی ہے کیپٹن غو تعلق جہارکھنڈ غا رانچی تیں ہے جدکہ نائک جموں خطہ غا سانہہ ضلع غا اترپہینی علاقہ غا گراں بری کمبلا غو رہن آلو ہے لیفٹیننٹ گورنر منوج سنہا نے فوج غا بہادر جوانان نانہہ خراج عقیدت پیش کی۔جنہاں نے اکھنور سیکٹر مانہہ اپنی خدمات غے دوران اپنی جانان غی قربانیں دتی۔

CM PRE BUDGET

بکھ بکھ شر اکنداراں غے نال اپنی مصروفیات جاری رکھتا واں وزیر اعلیٰ عمر عبداللہ نے کل سول سیکرٹریٹ سرینگر مانہہ بجٹ نوں پہلاں ایک مشاورتی اجلاس غی صدارت کی اس اجلاس مانہہ جموں کشمیر اسمبلی غا اُن آلا بجٹ اجلاس تیں پہلاں بکھ بکھ شعبان سنگ تعلق رکھن آلا رہنما اداران گا نظریہ سمجھن ور توجہ دتی گئی گل بات غے دوران بکھ بکھ شعبان سنگ تعلق رکھن آلا شرا کنداراں صنعت کاران تاجراں ہوٹل آلاں گڈیاں لاریاں بارے چالاکاں سیاحتی کھڈاریاں تعلیم زراعت تے باغبانی غا ماہرین تیں علاوہ صنعت تے تجارت غا اداران غا رہنماواں نے جموں کشمیر غا اُن آلا بجٹ بارے اپنی صلاح باڑیاں غو اشتراک کیو شرکا سنگ خطاب کرتا واں وزیر اعلیٰ عمر عبداللہ نے اس گل ور زور دتو جے یاہ مشاورت سرکار غی بجٹ پیش کرن نوں پہلاں مشق غو ایک اہم حصو بن گئی ہے۔ جس غو مقصد موثر پالسیاں غی تشکیل تے وسائل نانہہ بہتر طریقہ سنگ تقسیم کرن غا سلسلہ مانہہ مچ سارا محکمان غی بصیرت اکٹھاں کرنو ہے۔

TRIBAL MINISTER

درجہ فہرست قبیلان غا امور بارے وزیر جاوید احمد رانا نے کل سول سیکرٹریٹ مانہہ تمام محکمان غی طرفوں قبائلی زیلی منوبہ ٹی۔ایس۔پی نانہہ بنان غا سلسلہ مانہہ ایک اعلیٰ سطحی جائیزہ بیٹھک غی صدارت کی اس بیٹھک غے دوران گل کرتا واں مژکورہ وزیر نے موثر نگرانی تے عملدرآمد ور زور دیتا واں مجموعی ترقی نانہہ یقینی بنان واسطے ایک بہترین ٹی۔ایس۔پی بنان غی لوڑ ور زور دتو۔اس موقع ور مژکورہ وزیر نے جانچ تے منظوری بارے ایگریگٹو کمیٹی نانہہ پیش کیا جان آلا ایک موثر پلان غی تشکیل خاطر سارا محکمان بشکار زیادہ تیں زیادہ تال میل نانہہ یقینی بنان بارے کہیو۔وزیر موصوف نے محکمان نانہہ کہیو جے وے ایک خا کوئیار کریں جس مانہہ واضع طور ور دسیو گیو وے کہ انہاں نے پشلا کچ براں کے کے کیو ہے اُن گا مستقبل غا کے منصوباں ہیں۔ تانجے بجٹ غی تجاویز مانہہ یوہ وی ظاہر وے اُن نے کہیو جے محکمہ نانہہ چاہیے کہ وے شر اکنداراں سنگ گل کریں تانجے درجہ فہرست قبیلان غی ترقی مانہہ درپیش خامیاں گو اندازو لایو جاسکے تے جت اصلاح غی لوڑ ہے ات اصلاحی اقدام شروع کیا جائیں۔

G&B MEETINGS

بہارتی فوج نے ضلع ریاسی غا لانچا علاقہ مانہہ مقامی گجر تے بکروال برادریاں غی میزبانی کی۔اس قدم غو مقصد کھلا مکالمہ غا سلسلہ مانہہ ایک پلیٹ فارم بنانو تھو۔ جس سنگ شرکا اپنا خدشاں گو اظہار کرسکیں تے نال ہی علاقائی ترقی بارے موقع لوڑتاں واں اپنی برادریاں نانہہ درپیش مشکلاں ور گل کرسکیں۔ گل بات غے دوران شرکا نے بے روزگاری تعلیم تک رسائی تے بنیادی ڈھانچہ غی کمی جیسا اہم مسلاں نانہہ کھل غے سانجاں کیو۔اس موقع ور دوطرفہ تعاون غے نال درپیش مشکلاں گا ازالہ ور خاص توجہ دتی گئی۔اس گل کٹھ غو مرکز علاقہ غی ترقی حفاظتی صورتحال مانہہ بہتری تے متنوع سماجی طبقات بشکار آپسی بھائی چارہ نانہہ برقرار رکھنو تھو۔
